

國家圖書館藏

中華歷史人物別傳集

綫裝書局

瞻屏山房輯本

屏山志畧

建甌雅青印刷



屏山志略序

閩中學派始於楊龜山而大成於朱元晦元駒傳李延平之緒而實淵源於劉文靖年十四卽從之遊時文靖退老彝山嘗以易不遠復三字自勗並示元晦其精微之詣如此學者稱爲屏山先生其軼事遺文散見羣書者不一而足非有人爲之彙輯成帙蓋屢後學景仰之忱余觀政是邦夙欲表彰文獻而有志未逮也崇邑詹生叔政好學深思營兢然抱殘守缺而於先生學說尤昕夕服膺不置自號瞻屏山人示夙志也茲編之輯豈徒足見先生學術之正與夫淵源之遠哉而閩學昌明殆於此卜之矣中華民國十一年孟春月溫陵蔡鳳機序



屏山志略序

今夫紀一事而朝野之風教明傳一文而古今之學術正則朝廷有採風之典太史有珥筆之權其次載之於郡邑志乘若夫搜輯遺佚表而章之以傳於世則出於學士之私然君子不以其私而廢之也何者文章之士登臨勝概一觴一詠猶足爲山川增重况先賢之流風遺韻所關尤鉅者哉有宋劉屏山先生爲當代大儒而朱子之師也文藝道德炳如日星讀先生全集者莫不深高山仰止之思而先生之軼事遺文散見於羣籍者尤足爲徵文考獻之助顧忍令其汗漫湮沒乎哉吾友詹子叔政好學深思士也日者出所輯屏山志略二卷見示伏而讀之瞭然於先生家世之流傳生平之事略學派之

淵源不啻見堯於葵見舜於牆焉嗚呼詹子生居先生之里相距幾七百有餘歲矣時則西學爭鳴自命時髦者莫不醉心歐化詹子獨能抗心希古蒐闕抱殘俾後之人景仰前徽益增其論世知人之感狂瀾之倒將藉是以挽之絕學之一髮將藉是以繫之然則志略之輯豈徒爲一人一邑之私其殆以補史乘之不及而維風教正學術於天下萬世也已甲寅立秋日洪簡序

屏山志略自序

屏山志略一書志屏山先生事略固出於景行之私摭摭一二視程朱闕里志南溪書院志皆不及也書分兩卷試筆於甲寅因事中止自是作客劍州年復一年新知無尺寸增長而舊學轉隨世風以退化用滋愧懼猶幸此卷未失落於擔頭船底偶一檢閱復勃然興高山仰止之思適假旋梓里纂修邑志重取是編而完之不禁喟然嘆曰今之學者視倫理爲桎梏主放任爲自由與先生當年復性之功不啻霄壤安得與同志者佩先生三字符而同復於善俾天下人心未死則國學昌而國性存也時民國辛酉古歷十二月詹繼良序於縣志局



屏山志略參攷書

正誼堂全書 性理大全 宋元學案 周易折中 通鑑二十
一史約編 名臣言行錄 尚友錄 策府統宗
福建通志 建甯府志 崇安縣志 武夷志 程朱闕里志
南溪書院志 屏山全集 朱子文集 真西山文集
雲莊文集 山澗詩集 梧岡詩草 四先生年譜
劉氏家乘

屏山志略目次

繪圖

家世 以下至年譜首卷

本傳

年譜

學派 以下至詞翰次卷

遺著

詞翰


附錄

四

文靖遺像



屏山書院



潭溪故里



開善墳林



屏山志略卷一之上

同里後學詹繼良纂輯

游藝圖譜錄

詹起南校字

建安道立甲種
森林學校學生 捐印

家世

朝宗之山出自星河其源遠矣劉氏居崇之潭溪二百年而文靖挺生積德累仁已非一世然不沿流溯源安知其世澤之留貽乎尼山啓聖紫陽毓哲明德之後必有達人翼閔劉氏家乘而益信輯家世劉氏隋唐系也自元王交封楚居彭城支派彞衍今九大族並出元王之後唐史幾言劉悉出彭城非也京兆劉氏乃九族之一周有石

五

州刺史懿隋有上柱國詔唐史有民部尚書文靜曰文靜子樹義而下未詳其繼惟我始祖之居潭溪也蕩拓焚拂以啓山林二世而廬室完三世而田疇闢庸生光位光位生玉玉生文廣文廣生朝議公太素於是崇禮文篤經術謹遊從厚風化是載是循久而弗忘識者知其後之必大也

節錄屏山集處士劉公墓表

宋贈朝議大夫劉太素

勅曰人臣膺一命之寄效力於公者孰不欲邀君之寵以爲榮也資政殿大學士銀青光祿大夫劉幹之祖太素文學博通經義博覽既觀修立之道宜示激揚之恩特贈朝議大夫尚欽顯命永慰幽原

建

炎綸音

宋贈太子太保光祿大夫劉民先

勅曰國家推恩臣下必及其親者所以重本勸孝也而何間於存歿哉資政殿大學士銀青光祿大夫劉幹故父民先慶鍾厥子祿養不逮揆其所自宜有顯褒茲特贈爾爲太子太保光祿大夫靈其不昧尙克承之

建炎編音

宋諡忠顯公劉幹

朕褒揚臣節以勸天下忠義之心備飾國章以起天下豪傑之氣將屈羣策冀弭外虞爰念純臣能傳大誼載舉易名之典四頒節惠之文故贈特進資政殿大學士崇安縣開國伯食邑九百戶劉幹沉毅不同忠誠無二服勞宣力早聯禁近之班禦侮折衝晚奉藩垣之寄

六

靖康之季亭嶠弛嚴駭突騎之長驅嘆中原之失御子卿之拘胡壘甯受挽詞袁盎之在吳軍豈爲賊用森矛戟而不懼望城闕而增悲慨然視死以如歸允矣見危而致命已極崇終之閔冊未揚垂後之隆名是用下之奉常考其素履臨民撫俗彬彬古君子之風徇國忘身凜凜烈丈夫之概兼茲美諡式表精忠豈同千駟之無稱尙想九原之可作英魂未泯休命其承可賜諡曰忠顯

建炎編音

屏山志略卷一之中

同里後學詹繼良纂輯

游藝圃磨錄

詹起南校字

建安道立甲種
森林學校學生 捐印

本傳

屏山先生以道德學問爲名賢師一言一行均堪不朽故宋史通志列入儒林郡志邑乘傳之理學讀茲傳者足以見其靜退之風與夫精微之詣詩曰高山仰止景行行止雖不能至竊心嚮往之焉輯本傳

宋史儒林傳

七

劉子鞏字彥冲贈太師幹之季子以父任授承務郎辟眞定府幕屬幹死靖康之難子鞏痛憤幾無以爲生廬墓三年服除通判興化軍寇楊勅犯閩境子鞏與郡將張當世畫計備禦如素服戎事者賊不敢犯事聞詔因任子鞏始執喪致羸疾至是以不堪吏責歸武夷山不出者凡十七年間走其父墓下瞻望徘徊涕泗嗚咽或累日而返妻死不再娶事繼母呂氏及兄子羽盡孝友子羽之子珙幼英敏嗜學子鞏教之不懈珙卒有立與籍溪胡憲白水劉勉之交相得每見講學外無雜言他所與遊皆海內知名士而期以任重致遠者惟新安朱熹而已初熹父松且死以熹託子鞏及熹請益子鞏告以易之不遠復三言俾佩之終身熹後卒爲儒宗子鞏少喜佛氏說歸而讀

易卽渙然有得其說以爲學易當先復故以是告熹焉一日感微疾卽謁家廟泣別母與親朋訣付珙家事指葬處處親戚孤弱之無業者訓學者修身求道數百言後二日卒年四十七學者稱屏山先生福建通志儒林傳

劉子翬字彥冲父幹自有傳蔭補承務郎辟眞定府幕屬官痛父幹死國難哭墓三年服除通判興化軍事秩滿以最聞詔仍舊職子翬始以執喪致羸疾至是自陳不堪吏責丐祠歸主管武夷山冲佑觀獨居於屏山下潭溪之上間數日輒一走父墓瞻望徘徊涕泗嗚咽或累日而返事繼母呂氏及兄子羽子翼盡孝友與胡憲劉勉之爲道義交每相見講學外一無雜言生平持論以敬爲修性之門以孝

八

爲全性之本後生有來問學者告語成就終日無倦色如是者凡十有七年初吏部郎朱松將死顧其子熹曰籍溪胡原仲白水劉致中屏山劉彥仲此三人者吾友也其學皆有淵源吾卽死汝往父事之惟其言之聽吾死不恨矣因自爲書以家事託子翬兄子羽朱子遂往從子翬受學子翬教之如親子弟所詔示期許皆非常人之事及病朱子自奉湯藥侍側問入道次第子翬曰易所謂不遠服者吾三字符也子翬少喜佛氏說既而讀易有得渙然大悟以爲進德當先復嘗作復齋銘聖傳論以見志故以是告朱子朱子佩之終身卒爲儒宗紹興十七年卒年四十有七學者稱屏山先生理宗朝追諡文靖子翬少時有志於世務論維民則曰維其心則治解其心則亂講

經制則曰裁抑之怨特小嗟剝削之痛爲大憾子羽知泉州子翬代子羽作論時事劄八策一立江北之藩衛二據荆襄之要圖三擇忠良以統禁兵四設戰守以備江屯五講樓艦以習水軍六戍南軍以習征戰七合吳蜀以互聲援八募勁卒以張國勢皆確然可見之施行以疾故不竟其用論者惜之年三十喪妻不再娶以子羽之子珙爲嗣

建甯府志理學傳

劉子翬字彥冲幹季子也以蔭補承務郎卽辟眞定幕屬幹死靖康之難子翬痛憤家國之變哭墓三年服除通判興化軍尋以宿疾辭歸武夷山不出者十七年間走父墓泣泗嗚咽或累日不返妻死不

九

再娶事繼母及兄子羽孝友備至子羽之子珙幼嗜學子翬教之卒有立與胡憲劉勉之爲道義交憲之言曰予與彥冲居相鄰世相好而臭味又同每見必有所益勉之亦曰有質疑而取正每虛往而實還朱松病革囑其子熹師之熹問入道次第子翬告以易之不遠復者乃吾三字符也佩服周旋罔敢失墜嘗作復齋銘聖傳論以見志又嘗謂復卦易之門戶學易者當自復始子翬天資卓異屬意高深於書無所不讀語不妄發鄉人子弟來見必告以孝弟忠信之道學者稱爲屏山先生卒諡文靖有文集二十卷詳見宋史本傳

崇安縣志理學傳

劉子翬字彥冲幹仲

當作

子以父蔭授承務郎辟眞定府幕屬痛父

死幾不能生廬墓三年服闋除通判興化軍寇犯閩境與郡將張當世畫計備禦賊不敢犯以執喪致羸疾不堪吏責辭歸居武夷屏山下閒走父墓下徘徊瞻望泣泗嗚咽妻死不再娶事繼母呂氏及兄子羽盡孝友教姪珙不懈所與遊皆知名之士朱松且死以子熹託之每相見講學之外并無別言深於易學家有東西二齋東以復名西以蒙名自謂不遠復者吾之三字符也熹冠爲之字元晦作字說貽之有云木晦於根春容睟數人晦於身神明內腴故熹書門符云佩章遵考訓晦木謹師傳卒年四十七學者稱爲屏山先生



屏山志略卷一之下

同里後學詹繼良纂輯

游藝圃謄錄

詹起南校字

建安道立甲種
森林學校學生 捐印

年譜

學者尙友古人莫不欲詳其人之出處與其人之始末藉資印證奉爲楷模曹道振爲羅豫章編年譜毛念特爲李延平訂年譜皆此意也茲編乃搜取羣籍摭拾舊聞分年論次其事以便檢考敢曰知人論世耶輯年譜

宋徽宗皇帝建中靖國元年

辛巳三月初七日公生於五夫里潭溪一歲

崇甯元年

壬午公二歲

大觀元年

丁亥公七歲

大觀二年

戊子公八歲

祖贈太保民先卒於里第

大觀三年

己丑公九歲

太保葬建陽西廓原

政和元年

辛卯公十一歲

政和五年 完顏阿骨打稱帝國號金

乙未公十五歲

重和元年

戊戌公十八歲

宣和元年

己亥公十九歲

宣和二年 遣使於金約夾擊遼後二年金滅遼

宣和七年

乙巳公二十五歲

娶陸氏

欽宗皇帝靖康元年 金陷汴京徽欽二帝北狩河北全土沒於金

丙午公二十六歲有靖康改元四十韻

靖康二年 是年一歲兩係五月以前爲欽宗靖
建炎元年 康二年五月以後爲高宗建炎元年

丁未公二十七歲

父贈太保幹自經於金營

(按太師正月死節凡八十日乃就斂顏色如生)

高宗皇帝建炎二年

戊申公二十八歲

葬太師於拱辰山自此哭墓三年

建炎四年

庚戌公三十歲

通判興化軍有到任與張守啓

紹興元年 金寇宋吳玠及其弟璘大敗之

辛亥公三十一歲

孺人陸氏卒

乞祠主管武夷冲佑觀自此優遊祠官之職十有七年

紹興二年

壬子公三十二歲

葬陸孺人於拱辰山與忠定夫人同丘 公撰墓表

紹興十年 金侵宋岳飛劉琦等大破之

庚申公四十歲

紹興十一年 殺岳飛稱臣於金納歲貢

辛酉公四十一歲

紹興十二年

壬戌公四十二歲

及門從子劉珙登陳誠之榜與劉如愚同擢進士公題有吾家亦有傳臚喜叔姪聯名賜第歸之句 珙少從公學教之不懈使務其遠大者是年二十一歲珙卒有立

紹興十三年

癸亥公四十三歲

朱熹奉父命及門受業

紹興十四年

甲子公四十四歲

仲兄大中大夫子翼卒

紹興十六年

丙寅公四十六歲

長兄贈少傅子羽卒公撰行狀

紹興十七年

十四

丁卯公四十七歲十二月初八日卒葬拱辰山至理宗朝追諡文靖

朱熹侍疾公告以易之不遠復爲三字符疾將革出故篋得平日省躬自勵之言命熹與黃銖筆之復手自更定篇名遺訓

按屏山先生集未載年譜家乘載生卒脫落其他之年歲惟讀先生送張守序曰庚戌張侯來守莆田余佐郡事後兩月至乃知先生倅莆之口卽建炎四年也又考武夷志載紹興元年辭興化通判主管冲佑觀紹興紀元於辛亥先生捐館於丁卯適符儒林傳辭歸武夷十七年之語而送張守序有言壬子春寇平天子召侯爲郎余亦及瓜焉者論年則辛亥壬子異其歲論事則既有辭之

一字必辭於秩滿之先瓜代在後遐想紹興元年辭通判而丐祠卽得冲佑命其去莆在壬子春夏之交讀張奉常諡議優游祠官之職十有七年武夷志非無據也至若朱子學年家乘莫載考朱子生於建炎庚戌以十四歲童子來學其年卽紹興癸亥也先生之娶室喪偶家乘亦無所考而先生撰立墓表載孺人享年二十四既卒於紹興己酉之明年當生於大觀戊子之歲自戊子至乙巳迢迢十八寒暄卽知十八歲作殯之期蓋宣和紀元七年於茲矣又若先生祖父死葬之年昆姪哀榮之日則各從本傳求之其附載之也從孔子年譜家屬門人並書之例又附載國家大事以劉氏世忠於國關係特切之故亦孔子年譜書及國君時事之例

十五

然先生道承東魯學啓南閩者也其年譜必須有道能文者爲之良何人斯豈敢冒昧執筆但幸生於先生之鄉慕之深故欲知之詳聞之久斯欲載之亟且觀先生事實本末凡無操行學業之人皆不可立於兩間矣用敬輯之以自勵云

屏山志略卷二之上

同里後學詹繼良纂輯

游藝圃謄錄

詹起南校字

建安道立甲種
森林學校學生 捐印

學派

學焉而已無所謂派濂洛關閩皆傳道也然而合於一者道之體分而屬者道之用師承門徑原難強同黃梨洲於諸儒學案外又述屏山學派以爲朱子所宗夫豈故爲門戶之見哉孔門弟子已分四科小成大成要各歸於道耳輯學派

全祖望曰白水籍溪屏山三先生晦翁所嘗師事也白水師元城兼

十六

師龜山籍溪師武夷又與白水同師譙天授獨屏山不知所師三家之學略同劉勉之門人曰朱熹呂祖謙胡憲門人曰魏掞之朱熹劉懋邵景之方未劉子輩從子曰珙嗣子曰珩門人曰朱熹劉懋方未

黃銖詹體仁 錄劉昌齡策府

劉珙字共甫生有奇質從季父子輩學時刻苦自勵登進士乙科孝

宗朝授翰林學士上言世儒多言漢高帝不悅學臣以謂高帝所不悅者特腐儒俗學耳使有告以帝王之學知其必敬信功烈不止此帝亟稱善官終觀文殿學士年五十七卒贈光祿大夫嗟悼

罷朝一日諡忠肅 節錄尚友錄

珩字平甫初以蔭補南嶽祠官最後調邵武軍司戶參軍會從兄

珙卒力請仍爲祠官退隱於家逍遙農圃若漠然無意於世者然爲州縣董社倉歛散爲帥司賑貧民舉子詢究利病鈎校簿書夙夜勤事不少懈雖居官者不能及也卒年四十八子學古勉功郎泉州同安主簿學博將仕郎 錄福建通誌

朱熹徽州婺源人少有求道之志父松知饒州疾革亟屬熹曰胡憲

劉勉之劉子輩三人學有淵源吾所敬畏吾即死汝事之熹奉以告而稟學焉既博求之經傳復徧交當世有識之士及舉進士爲泉州同安縣主簿罷歸聞延平李侗學於羅從彥得伊洛之正徒步往從之其學大要窮理致知反躬踐實而以居敬爲主築室武夷山中四方遊學之士從之者如市 節錄宋史

十七

劉懋字子勉蚤受學於屏山先生胡籍溪先生盡得義理精微之蘊以累舉恩入官終於朝奉大夫致仕燭其長子也與弟炳皆受業於家庭子勉授以河南程氏書曰兄弟觀此可以爲學矣 錄雲莊文集

方未字耕道莆田人元案曾孫少孤貧苦學游建安參謁朱熹乾道

中登第爲善化尉因見張拭拭深喜之謂世之與共生死同禍福

者未一人耳後拭帥荆南奏未及游九言爲屬曰是人能攻臣過

失歷仕著廉直聲終連江令 錄尚友錄

黃銖字子原少師事劉子輩與朱熹爲同門友少熹一歲而文略相

上下熹每嘆爲不可及其文學司馬子長詩書喜屈曹劉而下及韋應物尤善琴書隸得魏晉以前筆意其於騷辭能以楚聲古調

爲之兄弟三人俱有偶聲劉子暈贈以詩曰江湖三僂遠天地一翁愁後卒朱熹爲序其集

錄邑志

詹體仁字元善少從朱子學以存誠慎獨爲主爲文悉根諸理郡人眞西山早從之遊嘗問居官蒞民之法先生以盡心平心告之盡心則無愧平心則無偏當世服其確論

節錄宋元學案

歐陽光祖字慶嗣九歲能文時人稱童瑞從劉屏山朱子講學屏山甚稱重之朱子亦遣三子師事焉乾道八年再舉登第不赴趙汝愚張敬夫列薦於朝方欲召用而趙公去國後爲江西轉運卜築松坡之上湛然終老

錄道南源委

按黃梨州編劉胡諸儒學案劉子暈洛學私淑從子拱嗣子珩

十八

門人爲朱熹劉懋方朱黃銖詹體仁未有歐陽光祖其人茲從道南源委錄入並見崇安舊志

繼良識

屏山志略卷二之中

同里後學詹繼良纂輯

游藝圖譜錄

詹起南校字

建安道立甲種
森林學校學生 捐印

遺著

文以載道世教所關斷簡殘篇未可遺也文靖著作若聖傳論維民論漢書雜論記序表啓及雜著見於屏山全集詳矣備矣茲從集外掇拾一二片羽吉光亦堪寶貴前賢往矣後學小子甯無警歎之思耶輯遺著

復齋銘

十九

先生嘗作聖傳論續此文於顙子篇未刊屏山集者遂弗另置一篇按易之不遠復謂失之未遠能復於善先生以復名齋而自爲銘是篇乃其修身復性最得力處今從邑志藝文中錄出仍以復齋銘標題用示入道之齔

大易之旨微妙難詮善學易者以復爲先惟人之生咸具是性喜怒哀樂或失其正視而知復不蝕其明聽而知復不流於聲言而知復匪易匪輕動而知復悔吝不生惟是四知本然則一孰覺而存孰迷而失勿謂本有勞思內馳亦勿謂無悠悠弗思廓爾貫通心審取舍既復其初無復之者蕩蕩坦坦周流六虛昔非不足今非有餘伊顏氏子曰不易言庶幾之功默臻其極今我仰止以名斯齋念茲在茲其敢殆哉

錄邑志

雙峽橋記

建溪自崇安發源溪之東屹然而高者曰梨嶺建之望山也山之陽衆流合趨至籍溪始大梨之東有潭溪衆流合趨至交溪始大嶺之北有梅嶺衆流合趨至瞿溪始大三溪會而西爲衆洲所使轉而西南與黃石游坂等溪會至是八川共流湍瀨三鳴激泓源浦淑之含蓄輸清瀉濁悉因勢以來賦溜巒瀑從而附益之巨派長瀾橫畫翻發乃有章山屹其左右峯聳其右如輞如伏如雙闕峙如怒貌鬪水出其間折而復西焉橋跨兩山壘石爲五墩其二爲附岸刮土磨瓊合若無壘上乃駢臥修幹甃以堅填列飛宇十四楹規模宏麗且依山勢故益雄先是暴漲水爲硤所束激地成穴徹石無所寄橋乃陷觀妙道人詹哲鼎新營之或云下有石骨鎖溪因涸揭浮沙數丈見

石始創址自宣和丁未興役至是一周天矣既落成與鄉里之士游焉橋介崇建二邑間往來憧憧視昔艱險如行茵席間道人請文以記之因念平生與方外士遊大率皆好爲大言處之不疑彼其見是役也必抵掌而笑曰安用拳拳於此哉將駕鼉以爲梁引飛虹而踐其背翱翔於江海濤瀾以上不亦可乎吾聞其語矣未見其人也觀孫道人無誇誕言作平實事營斯橋也咄嗟而財聚力隨永爲一方之便是可記也於是乎書

錄邑志

修武夷冲佑觀疏

敬神如在敢忘恭肅之懷視漏弗慎曷稱清穆之奉茲焉有作誰曰不宜惟武夷之名山有冲佑之闕宇自昔秦漢而上顯著靈蹤由我

祖宗而來益嚴祀典實四方瞻依之地罄羣心歸懇之誠流澤所加無感不應今則歲時浸久棟桷就淪有震風淩雨之凄其無遽座虛帷之肅若欲如修繕顧乏羨餘過者皆爲憮然曾孫之寄何在矧衡茅白底尙懷必葺之安而仙聖所棲宜起勿傾之念願推樂施以就勝緣指廩推贏倘更新於琳館清心釋累會同宴於幔亭

錄武夷志

先生爲道人記雙峽橋喜其無浮誇言作平實事是篇以敬爲主亦無邀惠於神之詞人謂先生之學雜於禪未爲確論茲從集外搜補俾讀先生之文益信先生之道

繼良謹識



屏山志略卷二之下

同里後學詹繼良纂輯

游藝圃謄錄

詹起南校字

建安道立甲種
森林學校學生 捐印

詞翰

古今贊述屏山先生者多矣鴻篇鉅製觸目琳瑯固已附入先生之集無俟搜羅惟有關故實而堪考證者文不拘體悉錄於編既備掌故且誌景行惜先生從祀未果尙虛兩廡之位則安得輶軒採及彰前賢而詔來許以爲吾道之光哉輯詞翰

重建屏山祠堂記

明張矩

屏山劉氏自五季時有諱楚者由光州都督入閩生三子各擇居止曰懿居麻沙曰翔居五夫之屏山曰幽居后山皆據山水之勝而屏山三峯疊翠潭溪澄碧尤爲佳境三族益大以蕃惟屏山最貴且顯至九世孫諱幹者由科第歷仕羣牧至擢汴京留守北軍圍城克盡死節褒諡曰忠顯長子少傳又捍禦西蜀卒諡忠定孫樞密又障蔽江淮卒諡忠肅次子卽屏山先生啓朱子之道學卒諡文靖一門之內三忠一文名播南北勳銘彝鼎澤及曾元古今罕比也及有元之初載罹兵燹悉致散處惟忠顯公八世孫子長卓然追念先世誅茅蒞荒訪陳迹於故府之基重建屏山祠堂復揭朱子所書舊匾於門前作燕居以祀宣聖後作祠宇以奉文靖晦庵忠肅三賢遺像左齋

曰不遠復右齋曰毋不敬以所藏屏山文集傳忠錄及方是閒文集重錄諸梓廣傳於世遂於屏山右峯之下復創新居棟宇高敞簷阿周密黝聖甃砌燦然畢備區其中曰忠文堂楣間曰文安世家堂左曰勤室文靖公所書也右曰安分文公所書也先代所賜御札鐫石揭之屏間門之左塾曰讀書亦文公所書延師聚諸子習學其中舊有家園亭館十七景亦盡蕪沒所謂桂巖醒心泉橫秋閣萬石亭宴坐巖之屬漸復舊貫一日予特造訪焉因語予曰余強爲此冀後嗣守而勿替予爲我記之余曰源深者流長德厚者流芳此理勢之必然信而有徵也凡祖宗修德積善垂裕後昆子孫者又當繼志述事以紹前人之休則可矣成立之難覆墜之易豈不念哉今子長尋逐

遺蹤於數世之餘噓囁火於既微發枯槁於已瘁使荆榛瓦礫之場一旦翬飛鳥革突兀於眼前而屏山之紫翠潭溪之清淨復有光焉固可嘉矣然三忠之勲業文靖之道德文章誠能仰慕企及盡其修省之功出於流俗之表俾功名道德匹休於前又豈不爲繼志述事之大孝乎尙其曷諸子長起而謝曰此規戒之言是可爲記遂援筆以書錄劉氏家乘

水簾屏山祠記

清游庭訓

武彝天下之名山也而水簾一洞尤爲名山中之名勝焉宋大儒劉屏山先生與朱文公劉岳卿講學於此後世卽洞建祠由來舊矣屏山公之裔孫諱炎者家君子以其學有淵源延諸西席庭訓因之得

以日侍左右自明季鼎革師徒散處各竄一方及我朝一人首出四海又安而國運方新羣興利見甲午秋庭訓得吾師所授之經幸膺魁選闢後南歸訪吾師近祉知其隱於水簾者蓋亦有年余憲從武彝山北過赤石渡霞實入淡雲深處見夫層巒疊嶂而自成一局者知其獨闢武彝之奇觀也余且行且止遙望懸崖萬仞瀑水自天飛石壁廣數十丈高稱之斜覆爲厂中構祠宇棟樑巍然不施陶瓦其下有曲池流爲小澗自石橋下出入其門則豁然一洞登其堂則別有天地非若人間其斜陽倒影則見簷前有如雨如雲如霰如霧如珠如蝦鬚如龍湫如玉澗流晶如銀河瀉影如斜風舞雪而散漫紛飄猗歟休哉若無本者吾知其洞也可立而待也卽有本者亦不過

二十四

長流不息惟是沛然下之矣吾不知孰主宰是何以千絲萬縷而至於此極也庭訓於是得武彝之化境矣庭訓於是并可以悟天地之化機也吾師聞庭訓聲扶杖而出涕泗滂沱攜庭訓手而泣曰遙憶於立雪堂中與二三子朝夕晤對者依依猶在目前一自天各一方予謂師徒闊幕祇徒托諸夢想矣不圖而有復聚於此也既而喜曰昔予先人屏山公與其門人晦翁岳卿二先生講學於此後人不敢以先賢過化之區而廢其盛蹟因卽洞建祠中設屏山公神主而以晦翁岳卿二先生配其左右此崇儒重道之至意非徒所以安先靈正亦所以勵後學者也乃遭明季之亂而祠宇傾頽余目擊心傷於是拮据綱繆重興復創闢四歲月而始告成今鳩工方竣適以霽孔

之來是師徒復得聚於此固與予先人之師徒講學於此者有相默契者焉不特爲希孔彈冠履已也武夷名勝何處非水所少者惟余與希孔二人矣子盍爲我誌之庭訓拜而對曰屏山先生以理學名今古宜其功德之不朽禮祀之弗衰矣吾師能光前人之業克貽後嗣之謀迄今畫棟飛雲珠簾捲兩俾三賢之憑依如故百世之俎豆常新吾師之功德不亦與屏山先生後先映輝也耶猗歟休哉有先人以作之不可無吾師以述之有吾師以述之不可無庭訓以記之

錄劉氏家乘

重修屏山文集跋

清 劉秉鐸

先祖屏山先生嘗告朱子曰易之不遠復三字吾身之符也鐸嘗靜

二十五

而頌之復而思之易曰不遠復無祇悔元吉註曰能復於善不祇於悔大善而吉之道也思復卦之至理驗先生之平生而一一合焉先生於書無所不究而於復卦有得焉生平視聽言動一循於理是能復於固有之善也父貽死節憤痛廬墓是能復於孝親之善也通判興化寇犯閩境與郡守畫計如素服戎事者是能復於忠君之善也執喪致疾辭歸武夷奉繼母而盡孝事子羽而盡敬是能復於菽水承歡兄弟怡怡之善也交胡劉而講道學訓朱子而成大儒是能復於以友輔仁教育英才之善也其論治理則維民在得心得心在寬賦以至講經制之道萃科納之弊縣令之賢在戢下風化之責擇郡守而是能復於仁民愛物之善也其代上劄子立江北之藩衛據荆

襄之要塗擇忠良以練禁兵設戰守以備江屯講樓艦以訓水軍戍南兵以習征戰合吳蜀以互聲援募勁卒以張國勢是能復於盡忠報國恢復雪恥之善也至若聖傳論十首於堯舜則佩其精一於神禹則服其仁民於湯則見其日新不已於文則稱其涵養力健於周公則贊其謙光無逸於孔子則嘆其盡性踐形於顏子則慕其克復近易於曾子則思其孝敬純篤於子思則企其時中闡道於孟子則信其領會自得其遺訓有曰執事必處中又曰以敬直之中與敬帝王傳心之要是能復於千古不易之至善也顧其鐫版散失因與弟輩共謀付梓手錄其文而藏其原本俾先生之文廣傳於天下後世之學者苟讀先生之文而恍然有得則先生之不遠復三字固不獨

二十六

先生佩之朱子承之而人人皆可以服膺勿失也吾道之傳豈不盛哉朱子曰先生精微之學足以發蒙蔽學者勿淺視斯集焉可矣噫懿範在前家學不遠雖不能至心嚮往之聊題數語以跋厥後

錄劉氏家乘

屏山先生贊

明倪伯文

天姿卓異屬意高宏貫穿諸傳出入羣經潭溪之上吟咏怡情三字之符朱子服膺

錄呂志

題屏山劉氏

明藍智

高士山中習隱居猶聞著論託潛夫每懷李愿歸盤谷空擬知章賜鑑湖諸老文章多散逸百年亭館易荒蕪欲從二客觀陳迹定有賢孫致酒壺

錄山澗詩集

謁屏山詞堂

清邱鳳翔

十有七年居武彝講經允作紫陽師我來想到千秋後佩易三言又是誰

錄梧岡詩草

文靖書院匾額

力扶道統

宋大儒籍溪胡憲題

文安世家

宋大賢晦菴朱熹題

天南理窟

明狀元翁正春題

後學指南

明禮部尚書董其昌題

道承東魯

明諡文敏公楊榮題

學啓南閩

明諡文敏公楊榮題

二十七

水簾祠堂匾額

百世如見

宋大賢晦菴朱熹題

三字真詮

明大儒陽明山人王守仁題

芝城屏山祠匾額

世篤忠貞

明進士浙江監察御史顧甯孫題

道學淵源

明吏部尚書李默題

魏浚乞定歲時祭祀疏

尚寶司歷事監生臣魏浚謹奏爲乞

恩崇祀先儒事伏觀宏治十一年十二月十一日欽奉

詔書內一款天下軍民利病時政闕失有可興可革者許諸人直言